

宮
闈
典

宮闈典第四十三卷

皇后部藝文二

詩

漢衛皇后歌

漢書曰衛子夫爲皇后弟青貴震天下天下歌之

生男無喜生女無怒獨不見衛子夫霸天下

中宮詩二首

晉成公綏

殷湯令妃有莘之女仁教內修度義以處清謚後宮九嬪有序尹爲媵臣遂作元輔

天地不獨立造化由陰陽乾坤垂覆載日月曜重光治國先家道立教起閨房二妃濟有虞三母降

周王塗山興大禹有莘佐成湯齊晉霸諸侯皆賴姬與姜關雎思賢妃此言安可忘

中宮所樂歌

張華

先王統大業元化漸八維儀刑乎萬邦內訓隆宮闈皇英垂帝典大雅詠三妃執德宣隆教正位理厥機含章體柔順率禮蹈謙祇螽斯弘慈惠樛木逮幽微微音穆清風高義邈不追遺榮參日月百

古今圖書集成
世仰餘暉

長門怨

梁柳惲

玉壺夜悄悄應門重且深秋風動桂樹流月搖輕陰綺簷清露溼網戶思蟲吟歎息下蘭閣含愁奏雅琴何由鳴曉佩復得抱宵衾無復金屋念豈照長門心

有所思

費昶

上林烏欲棲長門日行暮所思鬱不見空想丹墀步簾動意君來雷聲似車度北方佳麗子窈窕能迴顧夫君自迷惑非爲妾心妒

長門怨

前人

向夕千愁起自悔何嗟及愁思且歸牀羅襦方掩泣絳樹搖風輕黃鳥弄聲急金屋貯嬌時不言君不入

戲贈沈后

陳後主

留人不留人不留人也去此處不留人自有留人處

答詩

沈后

誰言不相憶見罷倒成羞情知不肯住教道若爲留

皇后房內歌

隋牛弘

隋書樂志曰高祖龍潛時頗好音樂嘗倚琵琶作歌二章名曰地厚天高託言夫婦之儀牛弘修
皇后房內之樂因取之爲房內曲命婦入并登歌上壽並用之

至順垂典正內弘風母儀萬國訓範六宮求賢啟化進善宣功家邦載序道業斯融

昭德皇后廟樂章

舊唐書

唐書樂志曰昭德皇后廟迎神用永和登歌酌鬯用肅和迎俎用雍和酌獻用坤元飲福用壽和
送文舞出迎武舞入用舒和武舞用凱安撤俎用雍和送神用永和其詞內出

永和

穆清廟薦嚴禋昭禮備和樂新望靈光集元辰祚無極享萬春

肅和

誠心達娛樂分升蕭管鬱氛氤茅旣縮鬯旣薰后來思福如雲

雍和

我將我享盡明而誠載芬黍稷載滌犧牲懿矣元良萬邦以貞心乎愛敬若觀容聲

坤元

於穆先后麗聖稱崇母臨萬宇道備六宮昌時協慶理內成功殷薦明德傳芳國風

壽和

工祝致告徽音不遐酒醴咸旨馨香具嘉受釐獻祉永慶邦家

舒和

金枝羽部徹清歌瑤臺肅穆笙磬羅諧音遍響合明意萬類昭融靈應多

凱安

辰位列四星帝功參十亂進賢勤內輔扈蹕清多難承天厚載均並耀宵光燦留徽藹前躅萬古披

圖煥

雍和

公尸既起享禮載終稱歌進徹盡敬繇衷澤流惠下大小咸同

永和

昭事終幽享餘移月御返仙居璇庭寂靈幄虛顧裴回感皇儲

武后大亨拜洛樂章

同前

唐書樂志曰則天皇后永昌元年大亨拜洛樂設禮用昭和次致和次咸和乘輿初行用九和次拜洛受圖用顯和登歌用昭和迎俎用敬和酌獻用欽和送文舞出迎武舞入用齊和武舞用德和撤俎用禮和辭神用通和送神用歸和按樂志又有歸和一章亦送神詞也並載本集逸酌獻

二章

昭和

九元眷命三聖基隆奉承先旨明臺畢功宗祀展敬冀表深衷永昌帝業式播淳風

致和

神功不測兮運陰陽包藏萬宇兮孕八方天符既出兮帝業昌願臨明祀兮降禎祥

咸和

坎澤祠容備舉坤壇祭典爰申靈睭遙行祕躡嘉貺薦委殊珍肅禮恭禋載展翹襟邈志逾殷方期

交際懸應

下一句逸

九和

祇荷坤德欽若乾靈慙惕罔寘興居匪寧恭崇禮則肅奉儀形惟憑展敬敢薦非馨

顯和

拜洛

菲躬承睿顧薄德忝坤儀乾乾遵後命翼翼奉先規撫俗勤雖切還淳化尙虧未能弘至道何以契

明祇

顯和

受圖

顧德有慙虛菲明祇屢降禎符汜水初呈祕象溫洛薦表昌圖元澤流恩載洽丹襟荷渥增愉

昭和

舒陰致養合大資生德以恆固功由永貞升歌薦序垂幣翹誠虹開玉照鳳引金聲

敬和

蘭俎旣昇蘋羞可薦金石載設咸英已變林澤斯總山川是遍敢用敷誠實惟忘倦

齊和

沈潛演貺分三極廣大凝禎總萬方旣薦羽旌文化啟還呈干鉞武威揚

德和

夕惕司龍契晨兢當鳳展崇儒習舊規偃伯循先旨絕壤飛冠蓋遐區麗山水幸承三聖餘忻屬千

年始

禮和

百禮崇容千官肅事靈降無兆神凝有粹莫享咸周威儀畢備奏夏登列歌雍徹肆

通和

皇皇靈倦穆穆神心暫動凝質還歸積陰功元樞紐理寂高深銜恩佩德聳志翹襟

歸和

言旋雲洞兮躡煙途永寧中宇兮安下都包涵動植兮順榮枯長貽寶貺兮贊璇圖

中宮助祭升壇

中宗

坤元光至德柔順闡皇風
芳聲遠螽斯美化隆睿範
超千載嘉猷備六宮肅恭陪盛典欽若薦
禮宗

長門怨

沈佺期

月皎風泠泠長門次掖庭
玉階聞墜葉羅幌見飛螢
清露凝珠綴流塵下翠屏
妾心君未察愁嘆劇繁星

長門怨

一作劉皐

齊澣

熒熒孤思迫寂寂長門夜
妾妒亦知非君恩那不借
搗琴就玉階調悲心未諧
將心託明月流影入

君懷

長門怨

崔顥

君王寵初歇棄妾長門宮紫殿青苔滿高樓明月空夜愁生枕席春意罷簾櫳泣盡無人問容華落鏡中

長門怨

岑參

君王嫌妾妒閉妾在長門舞袖垂新寵愁眉結舊恩綠錢侵履跡紅粉濕啼痕羞被天桃笑看春獨不言

長門怨

李華

弱體鴛鴦薦啼妝翡翠衾鴉鳴秋殿曉人靜禁門深每憶椒房寵那堪永巷陰自驚羅帶緩非復舊來心

古風

李白

蟾蜍薄太清蝕此瑤臺月圓光虧中天金魄遂淪沒蟬蜋入紫微大明夷朝暉浮雲隔兩曜萬象昏陰霏蕭蕭長門宮昔是今已非桂蠹花不實天霜下嚴威沈歎終永夕感我涕沾衣

妾薄命

前人

漢帝寵阿嬌貯之黃金屋咳唾落九天隨風生珠玉寵極愛還歇妒深情却疎長門一步地不肯暫迴車雨落不上天水覆難再收君情與妾意各自東西流昔日芙蓉花今成斷腸草以色事他人能得幾時好

長門怨二首

前人

天迴北斗挂西樓金屋無人螢火流月光欲到長門殿別作深宮一段愁
桂殿長愁不記春黃金四屋起秋塵夜懸明鏡青天上獨照長門宮裏人

長門怨

劉長卿

何事長門閉珠簾只自垂月移深殿早春向後宮遲蕙草生閑地梨花發舊枝芳菲似恩幸看却被風吹

長門怨

楊衡

絲聲繁兮管聲急珠簾不卷風吹入萬遍凝愁枕上聽千迴候命花間立望望昭陽信不來迴眸獨掩紅巾泣

思君恩

令狐楚

小苑鶯歌歇長門蝶舞多眼看春又去翠輦不經過

長信宮

于武陵

一失輦前恩羅衣生暗塵唯應清夜月獨伴向愁人長信翠蛾老昭陽紅粉新君心似秋節不使草長春

長門怨

高蟾

天上鳳凰休寄夢人間鸚鵡舊堪悲平生心緒無人識一隻金梭萬丈絲

長門怨

裴交泰

自閉長門經幾秋羅衣濕盡淚還流一種蛾眉明月夜南宮歌管北宮愁

長門怨

張祐

日映宮牆柳色寒笙歌遙指碧雲端珠鉛滴盡無心語強把花枝冷笑看

長門怨

吳少微

月出映曾城孤圓上太清君王眷愛歇枕席涼風生怨咽不能寢踟躕步前楹空階白露色百草寒蟲鳴念昔金房裏猶嫌玉座輕如何嬌所誤長夜泣恩情

長門怨

劉媛

雨滴梧桐愁夜長愁心和雨到昭陽淚痕不與君恩斷拭却千行更萬行

哲宗發皇后冊寶三首

宋史

皇帝升坐乾安

既登乃依如日之升有嚴有翼丕顯丕承天作之合家邦其興朱芾斯皇子孫繩繩

降坐乾安

我禮嘉成我駕言旋降坐而蹕奏鼓淵淵景命有僕保佑自天永錫祚嗣何千萬年

太尉等奉冊寶出入正安

宣哲維公就位肅莊冊寶具舉丕顯其光出于宸闈鼓鐘煌煌母儀天下萬壽無疆

紹興十三年發皇后冊寶十三首

同前

皇帝升坐乾安

天地奠位乾坤以分夫婦有別父子相親聖王之治禮重婚姻端冕從事是正大倫

使副入門正安

天子當陽羣工就列冊寶既陳鐘鼓備設上公奉事容莊心協克相盛禮光昭玉牒

冊寶出門正安

穆穆睟容如天之臨赫赫明令如王之音虔恭出門禮容兢兢塗山生啟夏道以興

皇帝降坐乾安

朝陽已升熏風習至樂奏既成禮容亦備玉佩鏘鳴帝徐舉趾臺政穆宜以聽內治

皇后出閣乾安

猗歟賢后德本性成承天致順遡日爲明作配儷極王化以行萬有千歲奉祀宗祏

冊寶入門宜安

款成祇事時惟肅雍跪奉冊寶陳于法宮以俯以仰有儀有容明神介之福祿來崇

皇后降殿承安

溫惠之德禕翟之衣行中采齊禮無或違降于丹陛有客有儀委委蛇蛇誰其似之

皇后受冊寶成安

鏤蒼玉兮盛德載揚鑄南金兮作鎮椒房虔受賜兮有煜其光宜室家兮朱芾斯皇

皇后升坐和安

禮既行兮厥位孔安母儀正兮容止所觀奉東朝兮常得其歡求淑女兮豈樂多般

內命婦入門惠安

素月澄輝衆星顯列炳爲天文各有攸別椒房既正陰教斯設關雎麟趾應如響捷

外命婦入門成安

窈窕其容淑嫺其姿爛其如雲瞻我母儀曰天之妹作合惟宜粲然舞抃疇不肅祇

皇后降坐徽安

寶宇煌煌冊書粲粲副笄加飾禕祿有爛祇若帝休委蛇樂衍億萬斯年永膺宸翰

皇后歸閣泰安

太任徽音太妣是嗣則百斯男周室以熾天子萬年受茲女士如妣事任從以孫子

淳熙三年發皇后冊寶十三首

同前

皇帝升坐乾安

赫赫惟皇如日之光肅肅惟后如月之常禮行一時明照無疆天子莅止疇敢不莊

冊寶入門正安

卜月惟良練辰斯臧臣工在庭劍佩瑒瑒來汝凝承明命是將有淑其儀無或怠遑

冊寶出門正安

刻簡以珉鑄寶以金持節伊誰時惟四鄰自我文德達之穆清委蛇委蛇往迄于成

皇帝降坐乾安

冊行何邇于門東偏禮備樂成合扇鳴鞭皇舉玉趾如天之旋燕及家邦億萬斯年

皇后出閣坤安

椒塗蘭馭河潤山容副笄在首褱衣被躬靜女其姝實翼實從自彼西閤聿來殿中

冊寶入門宜安

德隆位尊禮厚文縟乃篆斯金乃鏤斯玉羣公盈門執事有肅願言保之永鎮坤軸

皇后降殿承安

規殿沉沉吐氣皎皎明章婦順表正人倫躡是左墀暨于中庭尙宮顯相罔有弗欽

皇后受冊寶成安

備物典冊樂之鼓鐘拜而受之極其肅雍司言司寶各以職從行地有慶與天無窮

皇后升坐和安

容典既膺壺儀既正羽衛外列揚顏中映如帝如天以莊以靚六宮承式二南流詠

內命婦入門惠安

葛覃節用樛木逮下形爲嬪則夙已心化茲臨長秋遂正諸夏以慶以祈百祥來迓

外命婦入門咸安